

Seken Timoti

Nægkiariien sə rani mə nəfe i nəkukuə

Nəpɪn Pol ruvərai raka Fas Timoti mine Taetas kətoni mə kəkwtəmhiri mwi in kuvei puvnimwə ia kalapus. Nənə in rirai Seken Timoti ia kalapus fwe Rom. Pol rukurən mə nəpɪn səvənhi ruvəkwa kwa mə tremhə ro pen rirai nəkukuə i revən ti Timoti. Pol rəpwəh nokeikeien mə trətoni a Timoti, mətə rokeikei mə trətoni nənə muvehi utə nətərigien səvənhi ti nəri nə mə in rokeikei mə nəpɪn tremhə Timoti truvehi təmwhekin ia wok səvənhi. Pol ramahatən Timoti ia niriiən nakalasia me maməvəhag min mə trərer isipwɪn ti nahatən eikuə me. Pol raməvəhag m Timoti mə Timoti traməkeikei məkwtəmhiri əknekɪn nəgkiariien sə ro nɪpərhiənien i kamahatən nakalasia me səvəi Kristo ɪrə.

¹ *Iou Pol. Iou aposol riti səvəi Iesu Kristo ti nəri nə mə Kumwesən rɪməni nəkwan mə tako. In rərhi pen iou mə takəvisau irapw nɪmɪruien sə in rɪməni mə truvei pehe m kitaha ruku pen ti Iesu Kristo.

² *Nəkukuə i rauvehe tukw ik, Timoti, nərik keikei.

Pwəh Kumwesən Tata səkitaha mine Iesu Kristo lərimənu səkitaha trəuəriari pehe namasanien mine napiiən mine nəmərɪnuien mik.

Pol raməvəhag m Timoti

* 1:1: Efes 1:1 * 1:2: 1Tim 1:2

3 *Ia nəpɪn mɪne ia ran, nəpɪn iakaməfwaki, rerik ramrhi rerin ik, nənə iakani vivi Kumwesən tukw ik. Iakamo tukwini nari min, mamō a noien me səmame iakukurən mə hatukwatukw ia nənimen rəmwhen ia kaha kupwən me səiou hənamo. 4 Nəpɪn rerik ramrhi nise nənimem sə rinaiu, iakokeikei pik mə takətoni ik, nənə rerik ragien. 5 *Rerik ramrhi nahatətəien pərhiən səim, in nəha nahatətəien sə kaha pran səim Loes mɪne mama səim Iunis kroukupwən rouahatətə irə, nənə təkwəkəwuni iakukurən amasan mə ik mwi ikamahatətə irə. 6 *Ro iamɪnhi irə iakuə tako pwəh rerim ramrhi nəri fwe ia rerim ramo ikamskai ti noien wok səvəi Kumwesən. Kumwesən rəriari nəri nəha mik fwe kupwən nəpɪn iakəmri utə rəgik mi ia niram. Tikaməkeikei meireiri nəri nəha pwəh ruək. 7 *Iakani iamɪnhi irə ti nəri nə mə Kumwesən ripkuvei pehe mhə m kitaha nənimwɪn riti sə ramo kitaha samhekɪr, mətə in ruvei pehe m kitaha nənimwɪn riti sə ramo kitaha saməskai, mamhokeikei kitaha me, mamhəkoui atukw kitaha mə tsəpko mhə noien ərəha.

8 *Ro iamɪnhi irə tikəpwəh naurisien ti nini irəpwien Iərimənu səkitaha, məpwəh naurisien mwi tukw iou, iərmama riti səvənhi sə iakamarə ia kalapus tukwe. Mətə pwəh krau pəri krouregi nəmisəien ti nəgkiariien amasan səvənhi. Kumwesən truvei pehe niskaiien mik mə tiko iamɪnhi. 9 *In riməuvehimiru kitaha, nənə, məkwein kitaha ia nəkweinien sə ro ikinan i.

* 1:3: Fil 3:5, Wok Me 23:1 * 1:5: Wok Me 16:1 * 1:6: 1Tim 4:14 * 1:7: Rom 8:15 * 1:8: Rom 1:16 * 1:9: Efes 2:8-9, Taet 3:5

In ripko mhə iaminhi irə ia kitaha ti noien me səkitaha, mətə in ro iaminhi irə ti nəri nə mə resi pen a nətərigien atukw səvənhi sə in ruvəukurən raka fwe tui nəpin tiprənə ramiwən ihi. Ia nəpin nəha in ruvəni raka mə truvei pehe namasanien səvənhi m kitaha truku pen ti Iesu Kristo. ¹⁰* Nənə təkwtəkwuni sətoni namasanien nəha ro m kitaha, ti nəri nə mə Iəmə sə rauvehimiru kitaha riməier pehe. Iəmə nəha in nə Iesu Kristo sə rino sampam ia noien iərmama remhə, nənə ia nəgkiariien amasan səvənhi ramo nərmama me hətoni mə tuhəfo mhəuvehi nimiruieren rerin. ¹¹* Kumwesən rinərpwi rəgin ia nirak, mini mə iou aposol riti sə takaməkeikei məvisau nəgkiariien amasan nəha, mahatən nərmama me irə. ¹² Nənə ti nəri nə mə iakamo iaminhi irə, iakamregi rərəha i ia kalapus. Mətə iapkauris mhə, ti nəri nə mə iakukurən iəmə sə iakani nipərhienien irə. In rəmri pehe nəgkiariien amasan səvənhi ia rəgik, nənə iakukurən amasan mə trətui amasan tukwe mamevən meste nəpin səvənhi.

¹³* Timoti, tikaməkeikei məkwətmhiri əknekən nəgkiariien me i səməme ikuvəregi raka iakini pehe tukw ik i. Nəgkiariien me nəha hatukwatukw, mamhahatən suatuk sə tikesi pen. Tikaməmwur pen ia noien mi nəha nahatətəien mine nokeikeiien sə krauku pen ti Iesu Kristo.

¹⁴* Ia niskaiien səvəi Nənimwın Ikinan sə ramarə ia reritaha tikaməkeikei mətui amasan ti nəri amasan sə kəmri pehe ia rəgin.

¹⁵ Ikuvəukurən raka mə nərmama pam fwe pro-

* **1:10:** 1Kor 15:55-57, Hip 2:14

* **1:11:** 1Tim 2:7

* **1:13:**

1Tim 1:10, 1Tim 4:6, 6:3, Taet 1:9, 2:1

* **1:14:** 1Tim 6:20

fens Esia hənəpwəh iou mhəuvavən. Iəmə mi nəha Fukelas mine Hemokenes irəha minraha.

¹⁶ *Mətə iakaməfwaki mə Iərimənu səkitaha trapi nərmama me ia nəkwai nimwə səvəi Onesiforas, ti nəri nə mə nəpən rīpik in ramomasan iou, nənə mīpkauris mhə iou mine jen me kinərihi iou irə. ¹⁷ Mətə nəpən rapirapw ia Rom, ramətui əmisə iou mamevən meste mətə iou. ¹⁸ *Iakəfwaki mə Kumwesən trəsəni in rətoni Iərimənu səkitaha trapi in ia nəpən səvənhi. Nənə ikukurən amasan mə rasitu pīk ia nirak fwe ia Efesas.

2

¹ Ro iaminhi irə, nərik, ik tikaməkeikei muvehi namasanien i raku pen ti Iesu Kristo pwəh ro ikiskai. ² Nənə nəgkiariien sə ikuvəregi raka iakinahatən kimiaha irə ia nəmri nərmama me həpik, tikaməkeikei məmri pen ia rəgi nəmə me nepwīn ikukurən nətigiteien ia nirəha mə tuhahatən nepwīn mwi. ³ *Tikəmisə krau mik rəmwhen ik iaruagən amasan riti səvəi Iesu Kristo. ⁴ Ikukurən noien səvəi iaruagən. Nəpən ramaruagən, ko rəpwəh nuvehien mwi wok me nepwīn, ti nəri nə mə raməmwur mə iəmə asori səvənhi rerin tragien. ⁵ *Iərmama səvəi naiuien traməkeikei mesi pen natuakəmien me səvəi naiuien. Mə rəpwəh ko kīpkəfəfau pen mhə kəfəfau səvəi nisaiien irə. ⁶ *Nənə iərmama sə raməmhū pīk ratukwatukw mə in trukupwən mesi kwənkwai nari sə rutə ia nəmhiən səvənhi. ⁷ Rerim tramrhi nəfe iakamini pehe tukw ik i.

* 1:16: 2Tim 4:16 * 1:18: Jut 21 * 2:3: 2Tim 1:8, 4:5 * 2:5: 2Tim 4:8 * 2:6: 1Kor 9:7,10

Iarimānu sākītaha truvei pehe nukurānien mik,
nənə tikukurən narimnari me pam.

⁸*Rerim tramrhi Iesu Kristo. In iāmə sə rinətui
mwi ia nemhāien sāvənhi. In kwənəkwus sāvəi
Kig Tevit. In i nəgkiariien amasan sə iakaməvisau
irapw. ⁹*Iou iakamregi nāmīsāien ti nəgkiariien
amasan i. Kīnərihi iou ia jen rəmwhen ia iou iāmə
iakamərui loa, mətə nəgkiariien sāvəi Kumwesən
ko kīpkərihi mhə ia jen. ¹⁰*Ro iamīnhi irə, nəri
auər a mə kamo nāmīsāien me ia nirak, mətə
takaməkeikei mamərer əknekin ia nəpīn me ti nəri
nə mə rerik ramrhi nərmama me nəha sāməme
Kumwesən ruvərfi raka irəha. Ikokeikei mə irəha
mwi tuhəuvehi nīmīruien vi sə raku pen ti Iesu
Kristo, nənə mharə rerin irəha min ia nuku-
raanien asori sāvənhi.

¹¹*In i nəgkiariien pərhiēn:

Trini minuə sāmamhə kitaha Iesu,
nənə tsaməkeikei mwi mhəmīru pəri kitaha
min.

¹²*Trini minuə samərer əknekin ia nahatətāien
sakitaha,
nənə tsaməkeikei mwi mhərimānu pəri kitaha
min.

Trini minuə səni mə səreirei in,
nənə in mwi traməkeikei mīni mə in rīreirei
kitaha.

¹³*Trini minuə kitaha sāmwei ia nahatətāien
sakitaha,
in traməkwətəmhiri ihi kitaha,

* **2:8:** 1Kor 15:4,20, Rom 1:3 * **2:9:** Efes 3:1,13, Fil 1:12-14

* **2:10:** Kol 1:24 * **2:11:** 2Kor 4:11 * **2:12:** Mat 10:33

* **2:13:** Rom 3:3-4, Nam 23:19, Taet 1:2

tì nàri nà mē in ko rìpkàtefi mhà nàgkiariien
me sàvènhì.

*Iərmama sà ramo tukwini amasan nari m
Kumwesən*

¹⁴ *Tiko nərmama me səim pwəh rerinraha ramrhi narimnari me i ikani. Tikini pen ti nirəha i ia nəmri Kumwesən mə tuhəpwəh nousariien ti nəgkiariien me. Noien nəha ko rìpkə mhə nari amasan riti, mətə ramouraha a nərmama səməme kamhətərig. ¹⁵ *Tikəmwur mə ik iərmama riti səvəi wok sə nəpìn Kumwesən ramətə wok səim ko rini mə “Wok səim ramasan.” Nənə tikəpwəh niregiien ikauris ti wok səim, ti nəri nə mə ikamahatən atukwatukw nəgkiariien sə ro nìpərhienien. ¹⁶ *Mətə nəgkiariien auər a me səvəi tìprənə i, ik tikəpwəh niniien. Nəgkiariien me nəha tuhəiri pen nərmama həuvən isipwìn ti Kumwesən. ¹⁷ *Nəgkiariien səvəi nərmama səməme kamhəgkiari iamìnhi truviris rəmwhen ia nìmwəpw ruvehe masori. Nəgkiariien səvəi iamə mi nəha Hameneus mine Faelitas ro iamìnhi. ¹⁸ Irau krìnouəpwəh raka nəgkiariien pərhien rauni mə nəpìn sə Kumwesən tro nərmama me pam hətui mwi ia nemhəien ruvəuvehe raka. Ia nəgkiariien nəha səvənrau krauouraha nahatətəien səvəi nərmama me nepwìn. ¹⁹ *Mətə nəri əknekìn Kumwesən rìnəmri kauvrhəkìn nìmwə ia təkuren rəpwəh nìkiuien. Nənə kìmərai pen nəgkiariien me i ia nìkaren: Riti mə, “Iərimənu ruvəukurən raka mə nərmama əfo me nəha

* **2:14:** 1Tim 6:4, Taet 3:9 * **2:15:** 1Tim 4:6, Taet 2:7-8 * **2:16:** 1Tim 4:7 * **2:17:** 1Tim 1:20 * **2:19:** Nam 16:5,26, Jon 10:14, 1Kor 8:3, Aes 52:11

səvənhi.” Nənə riti mwi mə, “Pwəh nərmama pam səməme kamhəni nīpərhienien ia nəghi Iərimənu həpwəh noien ərəha.”

²⁰ *Ia nəkwai nimwə asori riti nəri kaməni pen nari me irə səpəmsəpə. Rīpko mhə səməme nəha əpa kino ia aean mi nəha kol mine silva, mətə nepwīn mwi nəha ikin kīnərai ia nīpəri nei, nepwīn mwi kino ia nise tīprənə rərpwu muvehe mīskai. Nepwīn kaməni nari irə ia nəpīn ikinan me. Nepwīn kaməni nari irə ia nəpīn auər a me.

²¹ *Ro iamīnhi irə trīni mīnuə iərmama riti rəpwəh noien ərəha me, məpərhi in, in truvehe məmwhen ia nəri kaməni pen nari irə sə kīnəmri əpə mə səvəi nəpīn ikinan me. Kīnəpnəpenə raka irə mə iəmə asori səvəi nimwə nə rukurən nuvehien mo noien amasan me pam irə.

²² *Mətə noien ərəha me ntəmaruə me hokeikei pīk, ik tikaraka məpwəh nəvənien ipaka ti nīrəha. Ia nəpīn me pam tikaməkeikei mamo noien atukwatukw, mamahatətə ia Kumwesən, mamokeikei nərmama, mamarə ia nəmərīnuien. Tikamarə mamo noien me nəha kīmiaha nərmama me nəha səməme kamhəkwein Iərimənu ia rerīnraha sə ratukwatukw məmher.

²³ *Tikərer isipwīn ti nəresien me nəha nərmama həreirei nari kamhəni. Ikukurən mə nəresien me nəha kamhəvi pehe nəvisəien me. ²⁴ *Mətə noien səvəi iərmama sə ramo tukwini nari m Iərimənu traməkeikei mōpə. Rīpko mhə in iərmama səvəi nəvisəien, mətə in iərmama sə ramasan ti nərmama pam. In iərmama sə rukurən

* **2:20:** 1Kor 3:12 * **2:21:** 2Tim 3:17 * **2:22:** 1Tim 6:11

* **2:23:** 1Tim 4:7 * **2:24:** 1Tim 3:3, Taet 1:7

nahatənien nərmama, nənə niemaha rīpkəpi akwauakw mhə in. ²⁵ *In iərmama sə raməgkiari məru ti nəmri atukwatukwien nərmama səməme haməmwəki in, pwəh Kumwesən rəsəni irəha hərərig ia noien ərəha, mhəuvehe mhəukurən nəgkiariien pərhiən. ²⁶ Ia noien nəha irəha ko həier irapw ia kwənkru səvəi Setan in rīməuvehi irəha irə mamo irəha hamo nəkwān.

3

Tramevən ipaka ti nəpīn sampam

¹ *Mətə tikaməkeikei mukurən nəri. Tramevən ipaka ti nəpīn sampam narəien ia tiprənə i truvehe məknekin. ² *Nərmama tuhokeikei atukw a irəha me, nənə mhokeikei pik mane. Irəha tuhəfiəutə atukw irəha me, nənə mhərpwi pik irəha me. Irəha tuhəni nəgkiariien ərəha mhəuəsi nərmama me i. Irəha tuhərui nəkwai tata mine mama səvənraha. Nəpīn tukuvei pen nari amasan riti minraha, irəha tuhəpkini mhə tanak tukwe. Irəha tuhəpko mhə nəkur ikinan me ia nirəha. ³ Irəha tuhəpkapi mhə ti nərmama, mətə tuhərpwīn a tai nərəhaien səvənraha. Irəha tuhəni nīkare nərmama. Irəha tuhəreirei nari, mamho pen a nari ia nəpīn me, mhəpkokeikei mhə noien amasan. ⁴ Irəha tuhəuvsini təkutanraha m piəvnraha me, mho akwauakw noien ərəha, mhəpkətərig mhə ti noien səvənraha mine nəfe kamho. Irəha rerinraha trukuər ia nəgnəginiiien atukw irəha me, mhokeikei pik narimnari me nīpwrānraha ramregi ramasan irə, nənə, mhəpkokeikei mhə

* **2:25:** 1Tim 2:4 * **3:1:** 1Tim 4:1 * **3:2:** Rom 1:29-31

Kumwesən. ⁵ *Ia nəmri nərmama tukətoni irəha həmwən ia nəkur əfwaki me, mətə nəgse Nənimwən səvəi nəfwakien riwən ia nirəha. Nənə ik tikaməkeikei mərəri isipwən ti nərmama səməme hamo iamini irə.

⁶ *Irəha me nepwən kamhəuvnimwə ia nəkwai nimwə me mamheikuə ia nīpran me. Nīpran me nəha nəgsenraha riwən, həuvəpəmpəm ia noien ərəha me, nənə narimnari ərəha me səpəmsəpə hokeikei pik ramiri irəha. ⁷ Kamahatən irəha ia nukurənien ia nəpən me, mətə ko irəha həpkukurən amasan mhə nəgkariien pərhiən ia nəpən riti. ⁸ *Ikukurən klepa mi nəha Janes mine Jampres sə krauni ərəha Moses fwe kupwən. Nərmama me i iakani, irəha həmwən ia nirau, mamhəni ərəha nəgkariien pərhiən. Irəha nərmama me nətərigien səvənraha rikou, həpkahatətə pərhiən mhə ia Kumwesən. ⁹ Mətə irəha tuhəpkarə əpwəmwis mhə. Nərmama me pam tuhətə sas noien ikou me səvənraha rəmwən ia nərmama me hənətə sas noien ikou səvəi Janes mine Jampres fwe kupwən.

Nəvhəgien sampam

¹⁰ Mətə ik, Timoti, nəpən ikinakurirə ia nirak fwe kupwən, ikuvəregi raka nahatənien səiou, minətə raka noien səiou sə iakamarə mamə. Ikinətə raka nəfə iakaməmwur tukwe ia nimiruien səiou. Ikinətə raka nahatətəien səiou, mine nətərigien səiou sə iakaməfo mo raməpwəmwis. Ikinətə raka nokeikeiien səiou, mukurən mwi nərerien səiou

* **3:5:** Mat 7:15,21, Rom 2:19-20, Taet 1:16

* **3:6:** Taet 1:11

* **3:8:** 2Tim 2:25, Eks 7:11,22, 1Tim 6:5

sə iakamərer əknekin irə ia nəpin me. ¹¹ *Ikinətə raka nometəien me mine nəmisəien me kino ia nirak fwe ia taon me nəha Antiok mine Ikoniam mine Listra. Kinamometə iou iamınhi irə, mətə lərimənu səkitaha ruvehi raka iou ti nəmisəien me pam nəha. ¹² *Nipərhienien, nərmama me pam səməme hokeikei mə tuhəuvehe mho kuatia irəha Iesu Kristo, nənə mamharə ia narəien sə Kumwesən rokeikei, tukaməkeikei kometə irəha. ¹³ Mətə nərmama ərəha me mine nərmama eikuə me narəien səvənraha sə rinərəha raka tripkuvehe mərəha mwi. Irəha tuhaməikuə ia nərmama me, nənə mamheikuə atukw a mwi ia nirəha. ¹⁴ *Mətə ik tikaməkeikei məkwətəmhiri əknekin nəgkiariien sə kinahatən raka ik irə. Ikuvəni raka nipərhienien ia nəgkiariien nəha, mamahatətə əknekin irə, mukurən amasan nərmama səməme hənahatən ik irə. ¹⁵ *Fwe ia nouihien səim ikuvəukurən raka nəgkiariien me səvəi Nəkukuə Ikinan. Nəgkiariien me nəha kamhəuvei pehe nukurənien mik. Nukurənien nəha ramiri pen ik ikevən mahatətə ia Iesu Kristo mə Kumwesən truvehimiru ik. ¹⁶ *Nəgkiariien me pam ia Nəkukuə Ikinan haməuku pen ti Nənimwin səvəi Kumwesən. a Nəgkiariien me nəha hamasitu ia kitaha. Kitaha səukurən niniien nəgkiariien me nəha mhahatən nərmama, mhəni pui noien ərəha me səvənraha, mhəkoui atukwatukw irəha, mhəvəhag minraha ia noien atukwatukw. ¹⁷ Nəpin samo iamınha irə

* **3:11:** Wok Me 13:50, Wok Me 14:5,19, Sam 34:19 * **3:12:** Mat 16:24, Jon 15:20, Wok Me 14:22 * **3:14:** 2Tim 2:2 * **3:15:** Jon 5:39, 2Pit 1:20-21 * **3:16:** Rom 15:4, 2Tim 2:21 a **3:16:** Suatuk riti mwi ti niniien nəgkiariien i ia vas 16 ro iamınhi irə: Nəgkiariien me pam ia Nəkukuə Ikinan Kumwesən rineiahag pehe irə.

tro iərmama səvəi Kumwesən ruvehe məmwhen
tì noien wok amasan me pam.

4

*Timoti traməkeikei məvisau irapw nəgkiariien
amasan*

¹*Timoti, təkwtəkwuni iakaməgkiari pehe mik
rəmwhen krau krouərer ia nəmri Kumwesən
mine Iesu Kristo. Ikukurən Iesu Kristo in
iərmama sə trəkiri nərmama me pam tì noien
me səvənraha, nərmama səməme kamhəmīru
mine səməme həuvamhə raka. In trier pehe
mwi mərimənu ia nītətə səvənhi. Tì nəri nə mə
tro iaminhi irə, ro pen iakani pehe tukw ik i
mə ²*tikaməkeikei məvisau irapw nəgkiariien
səvənhi, mamərer mwatuk tukwe ia nəpīn me
pam, nəpīn nərmama hokeikei mə tuhəregi
mine nəpīn nərmama həpwəh nokeikeiien mə
tuhəregi. Tikini pui noien ərəha me səvənraha,
minise pen əknekīn tì nīrəha mə tuhəpwəh,
muvei pen nəgkiariien sə trasitu ia nīrəha, mo
iaminhi irə səim nətərigien rəpwəmwis, nənə,
mahatən amasan irəha. ³*Tikaməkeikei mamə
iaminhi irə tì nəri nə mə nəpīn riti trīpkuvehe
nərmama me tuhəpkətərig mhə nəgkiariien sə ro
nīpərhienien, mətə irəha tuhesi pen nətərigien
atukw səvənraha, nənə mhətui nahatən me
səməme tuhəni nəgkiariien sə nəkwəregīnraha
rəfiəfiə tì nīregiien. ⁴*Irəha tuhəpwəh nəgkiariien
sə ro nīpərhienien, nənə mhəuvən mhəkurirə
kwənagei eikuə me. ⁵Mətə ik, tikaməkeikei mo

* **4:1:** Wok Me 10:42, Rom 14:9-10 * **4:2:** Wok Me 20:20,31

* **4:3:** 1Tim 4:1, 2Tim 1:13 * **4:4:** 1Tim 4:7

nətərigien səim pwəh raməmak amasan ia nəpɪn me. Tikərer əknekin ia nəmisəien me sə kamo ia niram, nənə mo wok i səvəi nəvisaiuen nəgkiariien amasan, nənə mo pam wok səim sə Kumwesən ruvei pehe mik mə tiko.

⁶ *Iakani iaminhi irə ti nəri nə mə tripkə mhə tui nitek raiu rəmwhen ia waen i kətəgi pen ia təkure nifətə kuvei pen m Kumwesən. Səiou nəpɪn takier irə ruvəuvehe ipaka. ⁷ *Ia nimiruien səiou rəmwhen mə iakamaruagən ia naruagənien amasan riti. Rəmwhen mə iakamaiu ia naiuien əknekin riti. Nənə təkwtəkwuni iakino sam-pam irə, nənə iakamahatətə ihi. ⁸ *Təkwtəkwuni kinəpnəpenə kəfəfau riti fwe səiou kaməfəfau pen ia nəmə atukwatukw me. Iərimənu səkitaha raməkiri atukwatukw nari in truvei pehe kəfəfau nəha miou ia nəpɪn səvənhi. Tripkuvei pehe əpa mhə miou, mətə truvei pen mwi m nərmama me pam səməme hokeikei in nənə mamheitenhi in mə truvehe mwi.

Pol rokeikei mə Timoti trevən mətoni in

⁹ *Tikaməmwur muvehe mətə akwauakw iou, ¹⁰ *ti nəri nə mə Temas rokeikei pik anan narəien ipwet mine səvəi tiprənə i, nənə minəpwəh iou, muvavən fwe Tesalonaeka. Kresens ruvavən fwe Kalesia, nənə Taetas ruvavən fwe Talmesia. ¹¹ *Təkwtəkwuni Luk əpa ramarə kimrau min. Nəpɪn tikauvehe irə tikiri Mak kimrau min, ti nəri nə mə in rukurən nasituien mo tukwini nari miou. ¹² *Iakinərhi pen Tikikas ruvavən fwe Efesas.

* **4:6:** Fil 2:17 * **4:7:** 1Tim 6:12 * **4:8:** 1Kor 9:24-25, Rev 2:10 * **4:9:** 2Tim 1:4 * **4:10:** Kol 4:14, Taet 1:4 * **4:11:** Kol 4:14, Wok Me 15:37-39 * **4:12:** Efes 6:21-22

13 *Nənə nəpɪn tikauvehe irə, tikuvehi karkahu səiou səvəi nəkwieien iakinəpwəh raməmak ia nimwə səvəi Karpas fwe Troas. Tikuvehi mwi nəkukuə me. Iakoikei pɪk mə tikuvehi səməme nəha kɪmərai pen ia teki nani.

14 *Fwe kupwən, Aleksanta, iəmə sə ramo nari ia aean, ro pɪk nəmisəien miou. Iərimənu trərpwin noien ərəha me nəha rino miou. 15 Nənə ik mwi tikaməikei məsiari in, ti nari nə mə fwe kupwən in raməmwur mə trɪnise nəgkiariien səkitaha.

16 *Nəpɪn iakinərer vi ia nəmri iəmə asori ia kwopun i mə takini irapw nəgkiariien səiou ia nɪkaren səvəi nəgkiariien me nəha kamini ərəha iou irə, iərmama riti riwən ruvehe mərer ia nɪkarek mə trasitu. Mətə irəha pam hap raka ia nirak. (Iakəfwaki mə Kumwesən trəpwəh nərpwinien noien nəha minraha.) 17 *Mətə ia nəpɪn nəha Iərimənu səkitaha ramərer ipaka tukw iou, mauvei pehe nɪskaiien miou, mə iou iakukurən nəvisau irapwien nəgkiariien me pam səvənhi, nənə nərmama me pam səməme həreirei Kumwesən həukurən nireglien. Nənə in ruvehi raka iou ia nərəhaien nəha rəmwhen mə ruvehi raka iou ia nəkwai laeon. 18 Iərimənu səkitaha truvehi raka iou ia noien ərəha me pam nərmama hənuə tuho ia nirak. In trətə amasan iou meste in ruvehi iou mevən fwe ia nɪtətə sə in ramərimənu irə fwe ia neiai. Pwəh nəgnəginiien revən tukwe in ia nuk nuk me. Ouəh, pwəh ro iamɪnhi.

Nəgkiariien sampam

* 4:13: Wok Me 20:6 * 4:14: 1Tim 1:20, Sam 62:12, Prov 24:12, Rom 2:6 * 4:16: 2Tim 1:15 * 4:17: Wok Me 23:11, 27:23, Dan 6:22

¹⁹ *Tikini pen ti Prisila mine Akwila mine narmama me pam ia nakwai nimwə səvəi Onesiforas mə iakini ramasan ti nirəha i.

²⁰ *Erastas ripkukurirə mhə iou. In ramarə a fwe Korin. Nənə iakinəpwəh Trofimas fwe Maelitas, ti nəri nə mə in ramemhə. ²¹ Tikaməmwur muvehe akwauakw tukw iou kurirə nəpin səvəi nəkwieien ruvehe.

Iupulas, Putens, Linus, Klautia mine piəvtaha me pam ia kwopun i həni ramasan tukw ik.

²² Pwəh Iərimənu səkitaha tramarə ia rerim, məriari pehe namasanien m kimiaha pam.

* **4:19:** Wok Me 18:2, 2Tim 1:16-17 * **4:20:** Wok Me 19:22, 20:4

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nəfe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416